

Narrapredigt 2025 - (um neune z´Betzaweiler, um halbelfe z´Buacha)

Refr: **Wo Wind und Wella wulle weha, wirsch wieder seine Wunder seah.**
(für alle zum Mitsinga)

1. Jo wia? Jo ka des wirklich sai, i stand scho wieder do!
Sieh vor mir viele Narra sitza, und bin dazuana froh,
dass d´Narrapredigt fertig isch, des isch so a Geburt,
im neia Jahr noch allne Feschk, noch gibts an kloina Spurt.

Drum griaß i euch von Herza sehr, und hoff, ihr send wohlauf,
II: send dankbar und sind zfrieda, no nimmt des Glück sein Lauf.

Refr: **Wo Wind und Wella wulle weha, wirsch wieder seine Wunder seah.**

2. Des neie Jahr isch heilig, ihr werrat´s no vrleaba
dr Herr wird unser Lotterleaba, wird Neid und Streit vergeaba.
A hailigs Jahr macht uns bewusst, mir schdond in Gottes Welt,
die Wirklichkeit isch tiefer als ma sich des so vorstellt.

Im Gegasatz zu unserm Gefühl, dass alles rückwärts goht
II: spricht Gott des Leaba heilig, wie´s in da Bibel stoht.

Refr: **Wo Wind und Wella wulle weha, wirsch wieder seine Wunder seah**

3. So hommers von de Jünger gher, wo alles schdong long hont,
wo statt bloß fir sich selber, jetzt für Jesus schaffa gont.
Da Peter und da Andi, da Jakob und da Hans,
hont bisher au was gschaffet, erfüllt hots halt itt ganz.

Sie hont zum Überleaba ghet, grad so für d´Existenz
II: sie spürat aber au zum tiefra Sinn dia Differenz.

Refr: **Wo Wind und Wella wulle weha, wirsch wieder seine Wunder seah**

4. An alte hiene Netz rumflicka isch an große Fruschk,
wenn siehsch was alles meglich wär, vergoht dr manchmol d´Luschk.
und jeden Dag bloß „kleine Fische“, des macht au koin Spaß
do muss ebbes bassiara, do bassiart au was.

Da Jesus hot se aguckt und gsagt: Etz gont mit mir!
II: Des Menschafischa macht meh Sinn, do brauch i grad eich vier.

Refr: **Wo Wind und Wella wulle weha, wirsch wieder seine Wunder seah**

5. Was will uns dia Berufung saga, was lerna mir daraus?
Als erschdes: Weich it gar zu schnell dem Anruf Gottes aus!
Als zwoites: Musch it Angschd hong vor unbekannte Schritt.
Als drittes: Jesus isch dabei, er goht in Zukunft mit.

Ganz oft liegts bloß am Traua, etz gib daim Herz an Ruck,
II: und gang it weaga nasse Fiaß, glei zwoi Schritt wieder zruck.

Refr: **Wo Wind und Wella wulle weha, wirsch wieder seine Wunder seah**

6. Des Netz isch doch a Sinnbild und stoht für d´ Chrischdahait
mir sind mitnand verbunda, in Freude und im Leid.
Bloß machts koin Sinn, wennis Löcher hot, wennis hie isch und verrissa,
des lost natürlich Sicherheit und Trost und Halt vermissa.

Im übrige hot Jesus hier des erschte we.we.we
II: world wide web begründet, das Netz der Kirche.

Refr: **Wo Wind und Wella wulle weha, wirsch wieder seine Wunder seah**

7. Menschafischa isch itt schlimm, do nimmt niemand an Schade
koiner wird verhaftet und d´Freiheit goht itt bada,
im Gegadoil: du wirsch bewahrt vor Tod und Untergang.
Komm ins Boot der Kirche, freiwillig, ohne Zwang.

Beim Daufa wirsch zwar nass, du wirsch au wieder trocka
II: darfsch in da Arche Noah gerettet dinna hocka.

Refr: **Wo Wind und Wella wulle weha, wirsch wieder seine Wunder seah**

8. *Noahs Rede, gesprochen:*

No raispaziert, no raispaziert
Rettung isch hier garantiert!
Kommet in mai Arche,
zu Noah, dem Patriarche.

No raispaziert, no raispaziert,
jong ond alt, uhscheniert.
Wer will scho nicht gerettet werden
beim Untergang von dieser Erden?

No raispaziert, no raispaziert!
Hont Sie au scho reserviert?
Sie werrats sicher itt bereue,
Gherat Sie doch zu de Treue.

No raispaziert, no raispaziert,
die Costa Noah nia havariert.
Im Gegenteil, s´Meer goht unter
und wer bei mir sitzt, bleibt butzmunter.

No raispaziert, no raispaziert,
ob ängschdlich oder couragiert.
No raispaziert, no raispaziert,
bloß wer do mitfahrt, profitiert.

Der Kirche alter Weisheit Ratschluss
„Extra archam nulla salus!“
hoißt in unsrem Dialekt
„Wer itt mitwill, der verreckt“

Die Arche isch itt Ich-AG:
„I will leaba, Welt ade!“
Sie isch au koi Ammenmärchen
Drum kann ma do au bloß als Pärchen

auf maim „Traumschiff“ Platz erhalta. (*„Traumschiff“ wars Thema vom dies-*
Also immer zwoi Gestalta. (*jähriga Seerosa-Ball z´Buacha*)
Bloß guate Pärle sollat s´Leaba
noch da Sintflut weiter geaba. - Eaba!

(*wieder gsunga:*)

9. I glaub, etz wird’s scho klarer, warum a hailigs Johr,
da Herrgott macht an Neiafang! Mir machet uns nix vor:
Kaputt, wie unser Gsellschaft isch, brauchts viel Barmherzigkeit,
brauchts Menschafischer, Archa, brauchts d´Kirch für unser Zeit.

Und wenn Sie a guats Pärle sind, gibts Hoffnung au für Sia,
II: Sia kriagat au a Plätzle, und ihre Schandtata verziah!

Refr: **Wo Wind und Wella wulle weha, wirsch wieder seine Wunder seah**

(di nägschd Stroph isch bloß für d´Mess in Betzaweller, nicht in Buchau,
wega dem 25-Jahre-Narrazunft-Stoischweizer-Jubiläum):

10. Im Grund ischs mit de Stoischweizer jo au itt andersch gweah:
noch dreißg Johr Kriag hots z´Betzaweller gar itt schee ausgseah.
No holt da Pater Freiherr Stein a Arche voller Leit
bei grüner Welle übern See, vo dene d´Nochfahre send Ihr heit.

(in die Runde schauen und sprechen):

„Also, wenn i eich so aguck, I glaub, des waret au guate Bärla....“

- II: Seit fünfzwanzg Johr traget ihr den Nama voller Stolz
Glückwunsch zum Jubiläum, und Schule macha solls.

Refr: **Wo Wind und Wella wulle weha, wirsch wieder seine Wunder seah**

11. Da Profi-Fischer Peter hot manchen Sturm verleabt
war aufm See Genesaret mol ängschdlich, mol bestreabt
die Angschd zum überwinda, a paar Schritt übers Wasser num,
bevor er nasse Fiaß griagt hot, Jesus nimmts ihm ittmol krumm.

- II: Itt andersch gohts em Papst in Rom, der in des Fischers Schuah
bis heit Kritik und Krankheit trotz, Gottes Seaga au dazua!!

Refr: **Wo Wind und Wella wulle weha, wirsch wieder seine Wunder seah**

12. Drum auf und setzat d´Segel, Jesus isch mit uns im Boot,
Beschert uns reicha Fischfang, bewahrt uns in Seenot.
Und Menschafischer braucht er, heit wie eh und je!
Fahret also mit im Boot, es goht auf hohe See!

- II: Ihr kennat diesem heilige Johr, ganz bsonders sainem Namen
als Menschafischer Ehre macha, wenn er des befolgat. - (alle: „Amen“)

Refr: **Wo Wind und Wella wulle weha, wirsch wieder seine Wunder seah**